

蘇魏公文集

萬靈署

蘇魏公文集卷十九

宋太子太保右僕射同中書門下平章事司空魏國公蘇頌撰

逢年舜畊

裔孫萬靈錫經重榮

奏議

晉爵耀庭

奏請考校知縣縣令盜賊為殿最

臣伏觀條制約束捕盜官吏至為嚴密而鄉村盜賊未甚衰息及不盡敗獲者蓋由賞罰止於巡檢縣尉而不及知縣縣令故也臣以謂巡檢縣尉但能捕盜而不能使民不為盜若知縣縣令則其職在按察所部無所不統使之肅清一境勢不難也竊觀今天下縣邑有得人處往往預為條教暗設方畧既備之有素則姦宄無能措手縱有竊發終亦為之擒獲其因循之人則不然見責任所不及至有以盜賊為非己職事而不留意故奸黨得以容隱重為鄉村之患者良為此爾臣謹按考課令每年尚書省諸司得州牧刺史縣令盜賊多少並送考司是古之長吏有考校盜賊之明文近世遂廢其法甚無謂也況今州縣場務課額稍虧官佐猶不免累豈良民罹剝劫之害而親民之吏獨不任其責乎臣欲乞朝廷下審官院

流內銓共加詳定自今知縣縣令任內遇有強惡賊盜并獲與未獲並即時批上印紙厯子候成考或罷任日校其殿最量立賞罰如此則當官之人各知儆勸制盜之本斯亦一端

奏乞糶官米濟民

臣竊聞近日甚有近北災傷人民流移往鄰路州軍逐熟尋有朝旨下諸路令州縣常切存恤恭惟聖恩溥施靡所不逮恐州縣拘文不能上副仁憫之意何則流民所之惟是歲豐物賤便為安居之地今並准諸郡雖稍登稔若食口既多必是物價騰踊萬一將來秋成失望漂泊之民未有歸業之期坐食貴穀便見失所彼時須煩縣官賑救為惠差遲則其敝益甚矣臣以謂存恤之法莫若先平物價欲物價之平則莫若官為糶給使之常食賤價之物則不覺轉移流徙之為惠也臣欲望特降朝旨應有流民所聚州縣權將上供或軍糧米斛比見今在市實直量減分數估定價例將來更不得添長專差強幹官一員置場出糶直候流民歸業日即罷其約束事件並依昨來在京糶場施行收到價錢却委轉運司和糶斛斗充數如此孽畫比之出粟賑濟所費寡而所惠溥惟朝廷垂意幸甚

論東南不可弛備

臣伏以杭州東南要藩控壓江海鈐轄司總領一路兵甲賊盜公事其間郡縣皆邊江湖莞蒲嘯聚蓋常有之而人情輕揚易為搖動當平居無事之日尚須隄防況值歲時不易編戶失業者多盜賊乘間伺隙可不預為之備耶臣竊知向來有南京曹鄆州廂禁軍三五指揮在彼駐泊前年盡已抽歸將下未曾添填或聞日近亦曾差撥前去猶未及元舊人數臣欲乞朝廷因此災傷盜賊稍多之際特賜輟那近郡廂禁軍三數全指揮往彼駐泊委自鈐轄司常切體量本路如有羣黨盜賊州縣力不能制者立便相度人數差撥應副協力捕捉免致展轉結集騷動州縣

奏乞開修破藏口復三堂分殺黃河水

臣伏見河決小吳繇澶魏恩冀瀛滄諸州乾甯軍境內北流至界河東折入於海詔旨順水所居使為河道不復修塞決口此誠治河之上策而千古之大利也竊聞水官行郡縣圖方畧但欲循水繕營防竭而未議下流涵納之利害臣詢諸道塗之言以謂向之東流自澶淵至鹽山皆獨行不與諸水雜隄防甚遠猶或時有溢溢之患今既北行則與御河胡盧滹沱并合其在恩冀之間稍自成川則無復為害下至五遷渠數道皆合於徒駭俱入御河直注乾甯軍界只有木門撲棹劈

地三處通流界河而界河河道亦不甚廣濶既受衆水必須壅遏難行見今滄州界御河增減不常時或逆行乃下流不快之驗明矣即目下未甚湍猛而乾甯軍已告危急異時萬一秋水暴至界河疏泄不迭則滄州御河亦恐泛濫為患宜乎預為之慮也臣竊謂治河之急最在先度下流之勢大禹釀二渠播九河是也漢之議者所謂多穿漕渠以分殺水怒太宗朝案河使者劉錫趙孚等亦曰治隄防不若分水勢近年興二股之論皆其例也今濱滄州乾甯軍界乃古渤海之故地而大禹九河之下流自漢迄今皆為大河所經歸海之路雖數移徙而不離此境其勢使然也臣竊見滄州東北有三堂泊縱廣皆百餘里下連海道地名黑龍港自來停滯濬流以為遼限近歲隄防失完見已淺涸但為汙瀦設災之地其西與御河破藏口及范橋鎮相去不過三五十里可以分引河流東注泊內既滿溢則由黑龍港以入海其勢甚易臣在任內先曾差官相度方議奏請尋以解罷未果上其事今若稍興工開治以為河道決水入泊緣泊隄防有缺壞處更加增築以限積水此功一成不惟可以紓滄州御河泛溢之患兼得塘泊瀾漫足壯北道之形勢欲乞朝旨下水官相度可否施行

奏乞修疊京北驛路

臣近經過京北韋城長垣祥符等縣界多有積水衝注道路五七步至百十步泥淖沮如往來車馬阻滯甚多蓋由官司拘文非時不敢輒差人夫是致因循如此臣竊謂三代之時諸侯之國道有穢弗川無舟梁識者猶以為譏方今封域萬里皇華四達蠻夷內藩方職貢皆由此塗而出若使行李阻礙亦有司之失官也夏令曰九月除道十月成梁皆所以便行旅而使無病涉也近制秋夏稅賦輸納之際亦常舉行治道路修橋梁之令此皆民事之先急當官者宜為之預慮也臣欲乞特降朝旨下開封府界提點司指揮諸縣那官檢視道路應有水積泥淖阻滯處並許量事差倩人夫如法修疊須令高廣使往來者兩不相妨其係溝河道流舊有橋道處即官中支破材植重別創造務要壯實可行車馬候了畢日令佐常切提舉遇有損壞立便完葺其外處州縣亦乞下諸路轉運司依此施行如此則四方載乘負擔之人無不均受其賜也

奏乞重立不以赦降原免條約

臣伏覩不以赦降原減條約因慶曆中殿前馬步軍司并開封府奏請軍營家口作過將欲敗露便即逃走指望赦恩即來陳首皆得原罪自此遂有雖會赦降不在原減條臣昨知應天府日有宣毅軍人家口犯在登極大赦前以百日限內不

曾首後來改嫁又累經赦恩及德音減降近方事發勘結成案有司拘文不敢斷放臣與僚屬商議以其曾經大赦難為卻科決十年前所犯罪名尋已別作施行訖伏詳元起請本為倚赦作過之人情涉蠹害須當戒勵及後來因事續降條勅亦多此比臣愚竊度恐不謂再經赦宥或非時減降皆不得原減且再經赦宥動須累年冒犯之人容其追改非時減降豈可預期而指望釋放哉諸如此類若皆不與原減是無知之人一時犯罪偶未發覺則畢生負累雖欲改悔其路無由恐非朝廷原情立法之本意又慮法意當然有司不能盡曉未免使人枉陷深文欲望聖慈許下刑法寺重加詳明諸稱不以赦降原減條並謂犯事後遇赦降自當依法施行若事發或未發間再經恩需並許依例原減如此則德澤所施蒙恩者廣愚民抵冒得以自新

奏乞增修南京大內

臣伏以南京國之東門當吳楚閩越舟車走集之會蓋周之寰內而周之北門也自建都迄今六十餘年人物風流一時甚盛而宮殿城闕都未修崇惟大內正門以真宗皇帝車駕巡幸曾駐蹕於此肆赦觀酺因賜名重熙頒慶樓當時雖稍完飾然猶是雙門不改列郡之制內中只有御製詩碑亭子二座外更無屋宇俱是

榛蕪非所以尊藝祖肇基之邦慰都人俟望之志也臣伏觀大中祥符七年建京制曰可陞應天府為南京正殿以歸德為名即以牙城為大內尋降圖修造事雖頒下即未施行天禧中知府王曾相度減省舍屋別具圖進呈乞行營建景祐中知府夏竦韓億相繼奏請乞改內前正衛中隔城祥輝門及正南外城崇禮等門皆作三門適值歲時不稔並以陝西事宜未暇及此然亦逐次降朝旨令候豐熟日奏取指揮嘉祐中知府張方平亦曾經畫得旨只是修葺過祥輝崇禮二門餘尚仍舊臣近叨守鑰目觀其事闕門摧側棟宇墮頽蓋由守臣失於檢舉欲望聖慈頒命有司令討尋王曾等所奏再行相度酌中制度修葺歸德一殿并前後門四面軒廊仍改正門為三門大約不過一百餘間度其所費亦不甚多若自京師事材場八作司般輦事造了材木量差工匠役兵等逐旋修葺亦不至勞擾若謂間架稍多難為遽辦即乞只降指揮應天府支破係省錢赴京西木場收買材植先且修葺內門令稍合闕庭制度候工畢日漸次經營崇建殿宇等二三年間便可就緒庶幾興王舊都稍為壯麗近圻別鑰得以尊嚴表式四方事體誠重

奏乞差防河將副

臣伏以南京府城兩縣一鎮正當汴路教倉營壘官守民居夾河萬家最為繁庶

舊例每遇汴流泛漲卽差府縣就糧禁軍防河本處官兵官自當總轄近以諸軍皆隸將下兵官更不統領淮條沿汴合差防河兵級逐將依舊例權暫差撥卽不言統領之官臣昨知本府日值汴水泛漲尋牒逐將下差撥兵級上河而本將官以別條非本職事不得差委勾當逐官亦不得承受本條又無部頒明文其差到兵級連夜在外將官皆不敢往前照管竊緣府縣地分約二百餘里兩岸擺鋪不下數千人並無官兵管勾誠慮曉夕暴露失於提振深為不便臣欲乞今後如遇防河差出將下兵級許依賊發火起條逐將下那副將一員上河往來巡覲所募軍旅在外稍得整肅臣所起請只是乞令將副巡轄差出防河兵級卽不衝改前後條貫亦不妨本處訓練等事

論制科取士乞加立策等增取人數

臣伏觀今年四月戊申及七月乙卯詔書復置賢良方正能直言極諫科并立定策入三等四等次推恩條制有以見陛下勤求俊良樂聞謹論士之抱術畧懷憤懣者當繼踵而赴詔矣然臣竊觀本朝故事制科程式太嚴取人太窄自真宗以來每舉中第者多不過三人少或一人至有全不收者使豪傑之士有老於科舉而不預甄擢恐非朝廷聽言求士之意臣謹按漢文二年始詔舉賢良時對策者

百人而晁錯為上第武帝元光五年詔舉對策者亦百人而公孫弘為第一歷代沿襲廢置不常至唐而特盛每遇親策賢良等科中第者常下一二十人建中元年姜公輔等二十五人至元元年韋執誼等一十七人四年崔元幹等一十七人十年裴均等一十七人元和三年牛僧孺等一十五人長慶元年龐嚴等一十五人寶曆元年唐伸等一十九人大和二年裴林等二十二入自餘幽素將相等幾數十科取人亦眾其得士若蘇瓌蘇頲父子張說張九齡韓休裴珣楊綰崔羣韋處厚姜公輔牛僧孺元微之裴休輩皆出此選卒為輔弼名臣此外奇才博識之士垂名於後者不可勝數信乎制科親策可以收攬英俊有補於治道也而當時應詔之人或命州郡薦舉或許上書自陳被召者徑赴御試其推恩等第則第三等中書門下超資與處分第四等優與處分第五等即與處分由是言之程式蓋不甚嚴而推恩亦不甚厚至周顯德四年始詔逐處州郡依貢舉人式例別試解送尚書吏部量試策論三道共三千字內取文理俱優者方得解送上都本朝之制又加以六論或試於中書或試於秘閣合格方得赴御試其所試論題務求深奧每舉轉加艱難致合格者少蓋以推恩過厚故取人益艱况國家承平日久天下學士陶染風教競習藝文而應此科者尤號該洽其程文縱非優長未合上

等亦皆於古今義理潛心有素若蒙采收施之為政必須優於專經之人不為無益於朝廷也臣竊謂今來既立定策等推恩有厚薄則所取亦宜稍加人數臣愚欲望將來或請應人稍多即乞優加分數如合格人少即乞更加第五等分為上下入此等者只依進士第二甲第三甲注官亦不為僥倖若恐更添入流之人即乞以進士諸科御試不合格人數留充制科數目彼此通融俱無所礙如此則四方特起之人咸有榮進之望聖世搜揚之路幾有壅蔽之嗟矣

蘇魏公文集卷二十

宋太子太保右僕射同中書門下平章事司空魏國公蘇頌撰

逢年

裔孫萬靈重刊

奏議

耀庭

請詔儒臣討論唐朝故事上備聖覽

以上
原闕

因臣察上言請留意近代典故遂詔儒臣檢討唐朝故事日進五
條曾未期歲省閱迨遍嘗聞德音宣諭近輔以為有助聽斷臣伏見陛下祇紹先
烈勤勞萬幾治理之間多用仁宗故事外則邇英講讀經史內則臣寮進獻封事
古今得失之迹忠賢治安之策固已溢黈聰而積淵慮矣而臣愚管之見猶有所

陳者誠見陛下稽古奉天之心孳孳不怠故敢復僭越而盡言也臣聞之荀卿之言曰道不過三代道過三代謂之蕩言其遠而難信也本朝去唐正同三代其事近而易改所宜宸扆之留聽也臣欲望聖慈特舉慶厯故事詔史官學士采錄新舊唐書中列帝所行之事與夫羣臣獻替之言每日上奏數事清燕之間特賜覽觀所冀螢燭末光增輝日月臣不勝惓惓之願

尋詔請讀官不講日進漢唐故事以爲例

論屯兵漕河大要

臣今月初九日入侍經筵進讀三朝實訓至咸平六年契丹南牧真宗皇帝嘗命輔臣條陳禦遼之策因謂宰相李沆等曰今已屯大兵遼未有隙聚兵廣費民力何以充給自來建議營田河道多為帥臣所沮臣伏蒙聖問屯兵漕河孰長臣尋上對以為屯兵漕河二事相須關一不可蓋天下無事兵雖不用而邊防武備在乎戍守則屯兵不可闕也既有戍守必資糧餉積儲糧餉須由運漕運漕小阻其費百倍是漕河不可闕也方契丹連歲繹騷邊城謹備真宗以露師累歲思長久控扼之術故語及營田設阻儲糧贍軍之議蓋為息民止戈之漸而帥臣不能遠謀但矜甲馬雄盛反以設險為示弱故李沆又陳功之難成蓋人入互執所見參驗而行寔

為至便欲望聖斷決行是後雖與契丹講和然而運河營田終亦不廢至今沿邊
以為大利又國家禁旅大兵多駐沿河州縣皆取運漕之便也臣故曰屯兵漕河
二事相須闕一不可臣退而伏思聖問淵奧皆經國裕民之先務臣前對陳淺不
甚周悉輒復稽攷書傳所載前世已行之事進言其一二仰備聖覽臣聞古者內
諸夏而外荒譯故有甸侯要藩之限祭祀享貢之令蓋異遠近而別內外也遠人
不服則侯伯之國得以文告而懲艾之故文王命南仲伐玁狁城朔方而玁狁于
夷宣王命召公平淮夷至江漢而淮夷來求此攻伐征討之備素具故也秦并諸
侯天下混一而朔漠未服始皇使蒙恬將兵攻取疲敝中國卒無成功此無外禦
之所致也韓安國將兵屯漁陽上言方佃作時請且罷屯罷屯月餘而匈奴大入
上谷漁陽掠其人畜而去此失備虞之所致也自爾以來中國未嘗無剽竊之患
郡縣未嘗無戍守之役千金之費歲月相乘由是轉漕運糧之策興焉秦使天下
飛芻輓粟起黃腴直瑞反又音誰琅琊負海之郡轉輸北河率三十鍾而致一石六斛四斗為鍾
計道路所費凡用百九十二斛乃得一石正卒困民力漢守滎陽軍無見糧蕭何轉漕關中以給食糧
道不絕遂興漢祚此運漕有策與無策相去之萬萬也趙充國擊先零請罷騎兵
以步兵萬人留屯要害因田致穀威德並行大費既省徭役豫息以戒不虞唐姜

師度守易州始於薊門之北漲水為溝以隔奚契丹之寇又約魏武故迹傍海穿溝號平遼渠以避海道運糧者至今賴之此皆屯兵漕河前代之明驗也臣聞帝王之都必據形勢故三代居河洛之間漢唐宅咸洛之壤我太祖皇帝嘗爰洛陽山川之勝始有建都之意用軍校李懷忠陳汴渠運漕之利遂東還京師此實聖斷睿謀因時適變貽萬世之長策今京師有汴蔡之廣轉輸之饒沿邊有塘灤營屯之固鎮壓夷夏踰於金湯非三代漢唐之可擬倫也臣頃在先朝竊聞今太子太保致仕張方平嘗蒙神宗顧問汴渠興置利害方平奏曰古者建國必依山川今國家都汴實據平夷之地所以為形勢者禁旅也資禁旅者粟帛也所以富衆帛者汴渠也望戒有司以時開塞毋輒輕議天下幸甚神宗深以為然審此言亦可見屯兵漕河之大要也臣愚僭易開陳庶幾上裨聖政之萬一

議疏濬黃河

臣竊以方今河北之患莫大乎河流未復故道冀瀛之間民被其苦者多矣雖朝廷遣使臣僚建議而疏塞之策未聞定論臣元豐四年知滄州日正值河決小吳北流入鉅河直注界河同入於河當時詔旨順水所居便為河道不復修塞決口臣在郡日曾遣官按行及詢采民言以為向之東流自澶淵至鹽山皆獨行不與

諸水雜堤防甚遠猶或時有溢溢之患今既北行則與御河胡盧溝浣并合其恩
冀之間但瀾漫濶遠稍自成川居佔民田未為甚害下至五遷渠數道皆合於徒
駭俱入御河直注乾甯軍界只有木門廣濶既受衆水必須壅遏難行至臣代還
曾上言乞先相度下流之勢竊見滄州東北三堂灤縱廣皆百餘里下連海道地
名黑龍港其灤西與御河破藏口及港莊橋鎮相去不過三五十里可以分引洪
流東注灤內灤既滿溢即由黑龍港以入於海雖非經久之畫然亦足以紓一時
瀛蕩瀾漫之患尋聞事下都水監後來不復施行近者都水相度欲開孫村口入
故道若可行水則用功少而除患多是為上策矣或聞以地近北京恐有浸溢故
議亦未決臣以謂流河泛濫未有所向災及州郡已五六年若不早為經畫異時
夏秋大水則其患轉深矣臣愚欲望特降朝旨下都水監及河北轉運司合議孫
村口若故道尚存鹽山海口不至堙漲可以承納下流即速計功開道萬一以北
京逼近及海口堙漲未敢便行疏導即乞重別相度滄州界御河破藏范莊橋水
口增築三堂灤南隄以限水勢即開口放水由灤入海少寬瀛冀積水之患使目
下居民稍獲安堵然後別行經度久遠之利與其坐俟河清曷若兩圖以救其患
伏望朝廷留意不勝幸甚臣陋儒淺識愚無他長塵點近班每慚曠職伏遇皇帝

陛下開廣言路博訪在庭敢竭所聞仰應詔旨雖肉食者鄙非有遠謀而狂夫之言或蒙聖擇僭妄之罪萬死莫逃

奏乞罷起夫修支家河

臣勘會揚州近得江淮發運司牒准元祐八年十月二十六日朝旨令發運司總領開修楚州連水縣至海州石闥堰下運鹽河并創開支家河要見揚州管下縣分鄉村等第人戶立定式樣取索五等人戶內有係災傷去處及出役錢與不出役錢人戶等事并放稅分數詣實供報本州雖已依應施行臣竊見淮南係災傷路分又得轉運司牒經冬未有雨雪請差官祈求本州自十一月上旬於諸神寺觀祈禱備至并未有應訪聞民間尚未下得麥種已是過時來春必是闕食若更起夫役竊恐民情嗟怨有傷和氣臣伏見朝廷故事每遇災傷之歲諸色工役並權罷免今來楚海及本路諸處夫亦非目下急務欲望聖慈特降指揮下發運轉運司應係諸處夫役雖已得許差朝旨以今來亢旱並且權罷候將來豐熟日再取朝旨所貴人情安貼災沴自息

貼黃議者或謂官出錢糧催召人夫豈妨農事臣以為若催募情應只合出榜招召人自應募

今來預行勘會取索鄉村限定人數諸縣必須據數差科雖不應行官司督迫豈得避免如此河名催召

奏乞減定淮南鹽價